

SORIN LUPCI

Vracari agiuunâ

POEMATII ARMĂNESHTSĂ



Editura
NAUTICA

2020



CRISUTU DI PARINTSĂI SH-DI
PĂPĂNJII DITU SOIA ALU LUPCI, PI
URNIMII SH-TINJII ARMĂNEASCĂ,
SORIN EASTI ARMĂNU CURATU.
TA S-LU ANGALDĂSESHTSĂ,
LIPSEASHTI S-AI DUCHEARI
SH-MARI VREARI TI SĂMTA LIMBA
ARMĂNEASCĂ!

HRISTA LUPCI



Sorin Lupci



Vreari agiunã

Poemati armãneshtsã



Sorin Lupci



Vreari agiunã

Editura
 NAUTICA
Constanța 2020

Copyright © Editura NAUTICA, 2020

pentru prezenta ediție

Editura NAUTICA, 2020

Editură recunoscută de CNC SIS

Str. Mircea cel Bătrân nr.104

900663 Constanța, România

tel.: +40-241-66.47.40

fax: +40-241-61.72.60

e-mail: info@cmu-edu.eu

www.edituranautica.org.ro

Descrierea CIP a Bibliotecii Naționale a României

LUPCI, SORIN

Vreari agiunâ : poemati armâneshtsâ / Sorin Lupci. - Constanța :
Nautica, 2020

ISBN 978-606-681-131-6

821.135.1

INDEX

➤ ZBORU NÂINTI

Kira Mantsu - 1

Mihaela Liuta - 6

➤ MINDUIERI

Di dzuua ta - 11

Ti Cristiana - 12

Vreari agiună - 13

Kiro - 14

Aumbri fârâ minti - 16

Pirmithu ditu carti - 17

Vimtulu - 18

Zulapea - 19

Minduiari - 20

Alatusi armânească - 21

Geandarlu di nafoară - 22

Blâstemu - 24

Cânticlu armânescu - 25

Limba armânească - 26

Praxi pârintească - 28

Cânticu pi coru - 29

Toamnâ - 30

Câftări - 31

Mashi minduierli - 33

Fronimâ shi-kiskinâ - 34

Hii vreari shi-caimo - 35

Icoanâ di keatrâ - 36

Tricu kiro - 37
Ti unâ steauâ - 38
Ditu negura anjiloru - 39
Tâtseari! - 41
Kireari - 43
Pots s-aledz!.. pots? - 44
Agârshearea - 45
Nu mi cânoshtsâ - 47
Câbatea ali Yannâ - di Mihaela Liuta - 49
Pirmithi di pisti locu (Câbatea ali Yannâ) - 54
Pirmithi di sum locu - 59

➤ SHICĂI

Unâ-i bana, altâ nu-ari - 63
Armânlu la munti - 65
Ma dialihea, ma dixargu - 66
Back to the innocence - 68
Inimâ di gljetsu - 71
Made in Japan - 73
Trandafila - 75
Oh, lele - 76
Unâ njii di buiei - 78
Pap' Dodlu 81
Ahândoasâ minduiari - 85

KIRA MANTSU:

SORIN LUPCI – „VREARI AGIUNĂ“

Prota poemă alu Sorin Lupci tsi u adyivăsiu easti

„*Minduiari*“:

*“Msheati ducheru s-cheru tu cuprii,
Mutrescu di-aynaye shi-nj cadi milii,
Ănj tornu păltărli shi-nj-u frică s-mi vedu
Tu yilii...*

*Pi căljiuri di bană ănj caftu scupolu,
Sh-nu potu ta s-nj-ascotu ditu suflitu caimolu...
Că-i ciulduitu shi-cu mintea chirută,
Laolu.*

*Mi portu pitu' oaminji cu pseftă cuveti,
Măduuă cirucă, aspartă mileti,
Un laiu yinitoru' ashteaptă, s-adară - dzălili
Shcreti.*

*Lăngoari urută adusi chirolu
Tsi-astindzi ayapea shi-minteashti iholu,
Ăshi toarnă mutrita shi-n-alasă tu chisă,
Hristolu...“*

Atumtsea (07.09.2015) anyrăpseamu: „Cari va u adyivăsească aestă poemă, va s-dukească, ună sh-ună, că unu poetu cu mari hari u anyrăpsi... Nica unu poetu va s-intră tu avlia a poetsloru armănji!“

Shi ashi s-featsi! Nu shteamu cã Sorin Lupci avea shi alti poemati. Tora, cãndu amu dininti cartea a lui „*Vreari agiunã*“, vedu cã, dealihea, Sorin Lupci intrã tu aradha a poetsloru armãnji di adzã!

Minduiamu la zboarãli armaneshtsã: „*Gortsulu sumu gortsu cadi i ningã elu*“! Sorin Lupci ari tu ADN-lu a lui harea poeticã di la tatã-su, Hrista Lupci, cãntãtorlu cari adrã ahãnti cãntitsi shi pi zboarãli a lui... Ama, Sorin Lupci, tu aestã carti, easti ELU! Elu easti altu bãrnu, bãneadzã altu chiro personalu shi tu armãnami... Multi s-alãxirã di lumea tu cari sh-u tritsea tiniramea tatã-su, Hrista Lupci. Di-aoa yini nota lyricã, kiola filosoficã, tu poematli alu Sorin Lupci.

Poematli: “*Minduiari*”, “*Di dzuua ta*”, “*Vreari agiunã*”, “*Chiro*”, “*Pirmithu ditu carti*”, “*Mashi minduerli...*”, “*Icoanã di keatrã*” mi cãndãsirã, di la prota adyivãseari, cã Sorin Lupci ari cuveti poeticã. Shcurta poemã “*Alathusi armãneascã*” easti unu dealihea giuvairu:

“*Atselji, niscãntsã livendzã tsi-avea tufechea,*
Umplurã gâgoshlu cu bãruti xeanã,
Aminarã 'ndzeanã sh-plyuirã soarli...”

Tu aesti poemati Sorin easti “armãnu” ama, tu idyiulu chiro, easti shi omlu modernu di adzã, cu tuti niisihiili a lui existentsiali.

Niisihia, minduerli, antribârli suntu atseali cari angreacă tu poemati... “Ego”-lu personalu, mira, suntu a poetlui, ama shi a lumiljei tu cari elu băneadză.

*“Tu locu di somnu imiru, tu locu di yisu aleptu,
Mi batu cu noaptea lai shi-pumoara di pi cheptu,
Tsi-nji tsăni adiljatlu shi-inima-nj frimită,
Ănj frândzi tută bana, tsi-nj pari bitisită...”*

Lumea ditu poematli alu Sorin easti lumea di adză cari chiru multi di atsea di zămani, traditsiunală... Poetlu clasicu armănu nu sh-u dishcljidea inima a lui. Minduerli, uhtârli nu eara personali... Eară mashi ti Fară...

Poezia modernă armânească adusi aestă noauă alăxeari: poetlu nu s-andirseashti sâ-sh spună frimtârli, minduerli, anvirinârli. Elu iasi năntea adyivășitoriloru ashi cumu easti ELU: lăndzitu di mindueri, di niisihii, di deaspiru, di mărinari, aputursitu di pumoara existentsială. Easti unu mari amintaticu aestă alăxeari tu poezia modernă armânească.

Nu prindi s-lu cunoashtsă multu Sorin... Easti duri sâ-lj vedz mutrita, purtaticlu, tra s-aducheshtsă cã ai dininti unu Omu-ntregu, prăxitu, tinjisitu, canda andirsitu ma s-lj fats ună njică alăvdari... Suntu atseali hări cu cari criscu shi tată-su shi ti-atsea Sorin easti easti ahātu ligatu di Fara a lui armânească!

Tu poematli ti “fară”, “ego”-lu cheari shi Sorin Lupci easti armănlă cu vreari ti frats, ti limbă, ti cânticu,

ti Vreari shi Tinjii (“*Praxi pârintească*”, “*Limba armânească*”, “*Cânticu pi coru*”) :

*“Haidits, sotslji-a mei, adzã noi s-nã vremu,
Cã n-aflãmu uidia.
Shi s-n-avemu ca frats, cã va n-armãnemu
Cu vrearea shi-cu tinjia!”*

Multi di poematli alu Sorin suntu băgati sh-pi iho...S-cântã cu harãuã la adetsli armãneshtsã. Unu caduru musheatu, tu zboarã, easti poema “*Ditu negura anjiloru*”. Tu caduru videmu Sorin cilimeanu, pãrintsãlji Hrista shi Marioara, lãlãnjii shi-pãpãnjilii, cântãnda deadunu... Unu caduru mplinu di vreari, di tinjii...

*“Tu casa mea, cu cânticu sh-ayapi,
Cu-armonica-n bratsã - mãyipseashti tati
Cantitsi veclyi, lã aflã uidia...
S-li cântã duruti, Dafina shi-Maria.(...)”*

*Nu amintaiu tuti tsi vidzuiu tu yisi,
Ni mårli ushi nu furã daima dishcljisi.
Ma mi-anvitsarã tsi iasti duchearea
Shi-cã naima mari aveari i vrearea...”*

Sorin băga numa a cartiljei “*Vreari agiună*”. Uidisitã numã ti atsea cã Vrearea, ti vrutã, ti Armãnami, easti hirlu aroshu a cartiljei. Mashî vrearea easti: “*calea*

tsi nu s-dipiseashti shi-agiundzi iutsido.” Ti atsea cã Sorin anvitsã tu fumealji cã: *“naima mari aveari i Vrearea...”*

Sorin Lupci nu easti mashi liriclu, nyisãtorlu, niisihlu... Ari poemati tsi aducu nãinti pirmithi di zãmani, ca tu *“Pirmithi di pisti locu – Cãbatea ali Yannã”*.

Tu poezia armãneascã, daima, poetlu liricu, filosofu, existentsialu, armãni s-cãntã mashi aestu cãnticu... Ti ciudii easti cã Sorin Lupci poati s-anyrãpseascã shi poemati di “shicai” cu umoru, cata cumu tatã-su...

Ama, shi aesti poemati au damcã ahoryea. Siyura, shi aesti poematli cu umoru, shicãi, va s-hibã aprukeati cu harauã di armãnami...

„*Vreari agiuna*“ easti mashi prota carti di poemati alu Sorin Lupci. Alti, poati, ashteaptã s-iasã shi s-nã hãrseasca suflitlu apresu di vreari ti limba, poezia armãneascã!

21.01.2020

MIHAELA LIUTA:

SORIN LUPCI – „*VREARI AGIUNĂ*”

Cafiun ducheashti cum geanlu treamburâ di harauâ, s-pliguiashti di plângu, sumuarâdi cu mâreatsâ, s-aspari sh-s-andoapirâ di fricâ, sh-aspuni ghineatsa sh-umutea i sheadi anvirinat di pon nishtiut...ca un carusel di ducherî tsi n-alinâ sh-nâ dipuni pit ohturli sh-văyîurli di banâ. Ama psânji suntu atsei tsi sh-au stohâ , tsi au doarâ di la Dumnîdzâ sh-aspunâ dorlu, zgheclu, trunduiarea pit muzica divînă a zboarâlor uidisiti.

Ma s-vrei s-trets pitu chimatli ayri di-amari, cu ducherî ahândoasi, nvirin sh-alumtâ, s-anots tu apa limbidâ di vreari curatâ di pârînti, s-tsâ afli isihîyia pi arina angâldzâtâ di soarli imir a adutserlor aminti, dischidi tomlu di poemati al Sorin Lupci, “Vreari agiună”. Va s-afli unâ lumi plasticâ, mplinâ di buyiei, cu unâ cromaticâ arhundâ tu nuantsi spiritali, tsi va ti mâyipseascâ sh-va ti pitreacâ s-caftsâ njiedzlu ascumtu dit minduiarea poeticâ.

Poema tsi deadi sh-numa a tomlui dispeaturâ dinintea atsilui tsi-adghivâseashti nâ inimâ caldâ, cari tsasi un pirmit di vreari ti cari lucreadzâ tut universul, un iho cântat tu muzicalitatea stihurilor, cu unâ foami di zboarâ neacumtinatâ. Aestâ vreari dealihea, tsi pots s-ahuleshtsâ shi s-u bânêdz, s-alâxeshti pe-anarga sh-afli alti valentse aghorghea tu alti poemati: nâ vreari etericâ, aruptâ dit yisi, nâ vreari platonîcâ sh-mâyipsitâ, tsi tradzi dupu ea bair di frimtâri, antribări, trunduieri: “Fronimâ sh-chischinâ”, “Hii vreari sh-caimo”, “Tricu chiro...”.

Polimlu a ducherilor antagonice sh-aflâ dipisearea tu “Icoanâ di cheatrâ”, anda geanlu aleadzi s-vulisească yislu, pâghâna mâyii, s-armânâ mash partea curată dit inimâ, s-angropâ chisa, s-aleagâ lunjina...

Pisti tuti, prota sh-protă, nu-ai cum s-nu ducheshtsâ tu ahurhita a tomlui atseali poemati tsi-aspun vrearea di pârinti, ti taifâ, ti fumealji(“Ti dzuua ta”, “Ti Cristiana”)., ducheări curată sh-sirinâ, tsi s-aleadzi pit zboară-simbol: “anghil”, “neaua”, “albu”, “peani”. Sh-mansus di tuti, atsel stih tsi-aspuni-andreptu “Câ nu-i vreari ma mari ca vrearea di pârinti”.

Stihurili curâ ma ninti sh-u alaxescu vrearea iara: tora u duchim vrearea ti armânami, ti tut tsi easti farâ sh-mileti: easti zbor, cântic, armonică, pârintsâ, fumealji, prâxi, boatsea pâpânjilor di vâr chiro. Sh-nu psâni di eali s-adrară cântits hrisusiti, ti-atsea câ aduc dinintea noastă, cu zbor msheat sh-ritmat, giginchi anghilicioasi dit bana di vârôară. Sh-tu-aestu cadur bucolic s-andavgâ sh-atseali poemi tsi-aspun hoara armânescă cu-ună notă di humor, “ti hazi”, atseali shicâi neconventionsale, tsi iesu dit zborlu safi armânescu mintit cu zbor xen. Auatsi sh-aspuni Sorin Lupci doara. Tu laolu di tora, tsi s-dutsi câta ninti, cu aplicari câta tehnologii avansati, el n-adutsi aminti tsi yishteari doarmi tu laolu di vâr chiro: atea isihii sh-azapti, vluyii sh-ghineatsâ tsi u chirum fâră s-nâ duchim ici. Geanlu-a nostu armasi aclo, amplitit tu iarba a hoarăiei, alâgândalui cu vimtul pit dzenurli verdzâ, hârsindalui cu-aumbra noastă misihorea împlinâ di cântits, tsi tora sh-plândzi yirnjia.

Va mi dânâsescu niheamâ la doauâ poemati tsi nu sh-aflâ uidia tu tsi angrâpsi pânâ tora Sorin Lupci, poemati tsi dizvâlescu un universu apocaliptic tsi te-arucâ alargu, tu spida fuviroasâ al Stephen King i John Saul. Zborlu easti di “Pitmithi di sum locu”, tsi u adghivâsii prota sh-dealihea easti câ mi alâsă cu unâ antribari ahât greuâ:” Cari fu câbatea ali Yannâ?”. Sh-vini poemlu “Pirmithi di pisti loc”, ca unâ giuiapi ti uruta pumoară tsi s-arcuti pisti hoara trunduită: Yanna sh-câlcă zborlu sh-vrearea sh-geanlu. Aesti poemati alâxescu hoara armânească sirinâ, iu s-avdu cântits armâneshtsâ dit zâmani, isihâ sh-împlinâ di lunjinâ. Videm un cadur iu zundanea mâcâ loclu, geanlu-anfârmâcat adutsi cherdirea. Lunjinâ sh-aumbrâ, ghini sh-arău, Paradis shi scutidoasă dimunii...

Cafi poematâ ari banâ, sh-aspuni pirmithlu. Nu shtiu nica tsi nj-avu hari ma multu: zborlu safi armanescu, cuvetea tsi u ari s-alâxească vrearea tu-ahâti stranji i spida ahândoasă cu cari s-mutreashti tu gean, atea introspectsie intimă pit cângheyili di nuntru, câftândalui zundanea pâgânâ tsi va u-anchidâ tu chetrâ cu vula a minduierilor, ta s-sâlâghescă lunjina...

De-alihea poet tu zboară, tu minduiari sh-tu inimâ...

09.02.2020

Motto:

“Ureacljea mea-ndreaptâ cântări ascultâ
Di cari - nastânga-i sâtulâ!
Frâmtea, tsi-i singurâ - fineri apreasâ -
Tru sinea-lj, trâ ea mashi lunjinâ...”

Kira Mantsu



MINDUIERI

Dí dzuua ta

Cându lo neaua s-cadâ, tu 'msheata apiritâ
Ca nâ fustani albâ di 'nveastâ tinjisitâ,
Vinishi tini pi lumi, a mea dultsi hârseari,
Flurii amintatâ ditu vreari multu mari.

Di dzuua ta sirinâ nu pot s-tsâ facu urari,
Câ zboarâli nu-agiungu ti vreari ahântâ mari.
Ma mi asprigiuru câ bana, a tsâia ts-u tâxescu
Sh-di a lumiljei arali, daima s-ti-afirescu...

Ca-arâu treatsi kirolu, spidâ-ayunjisitâ
Cu apâ shi-ma curatâ shi-di multi ori mintitâ...
Tsâ voiu mari ayapi tu banâ, tsâni minti:
Câ nu-i vreari ma mari ca vrearea di pârinti...

*Marie, anghilu albu, a mea dultsi hârseari,
Flurii amintatâ ditu vreari multu mari...*

4.12.2008





Ti Cristiana

Geanlu albu, suflitu peanâ, anghilu vluisitu,
Dumnidzâ nji-ti deadi a njia, dzânâ ditu pirmitu.

Featâ dultsi, ocljii-ts caldzâ, di njiari a tău zboru,
Înji mi poartâ pisti banâ, torlu-a tau lishoru.

Înji hii adiatu, hii apa tsi banâ înji da,
Tsâ dedu numa, Cristiana, tini hiia mea.

26.06.2019





Vreari agiună


Scoalâ-nj-ti, vruta mea bunâ
Ta s-ankisimu noaptea, pi lunâ
Shi s-nâ hârnimu vrearea, agiună.

Vrearea curatâ s-dukeshtsâ
Cu boatsea ta dultsi sâ-nj greshtsâ
Sh-cu trupu a tău, feată, s-mi-anveshtsâ...

Fronimi, caldi, sirini,
Steali di vreari albi di-asimi
Tsâ grescu tuti,feată, la mini...

14.08.2015






Kíro


Iu-su atseali steali, tsi noaptea sh-ciuciura,
Când' tserlu cu amarea tu bratsâ s-tsânea,
Shi-luna tahinârli cu soarli s-bâshea?
Nidipisitu kirolu, ti 'nheamâ dânâsea...

Ayunjisitu shi scljinciu, agiunu ti bana mea,
Cu kicuta ayapea, kirolu-astesu ânj da...
Nicâpâitu misurâ, pi hirlu-a banâljei,
Tu locu di cumbuloi, bairu di anjlji-a melji.

Iu suntu tahinârli când' vimtulu alâga,
Pitu vâljuri mâlmâsiti, nveastâ ta sâ-shi lja?
Iu iasti lilicea cari-apriduna
Njica bubulicâ, tsi 'n-bratsâ-lj durnjea?

Turbatu shi-agiunu di yisi, di minduieri shi-di vreari,
Ashi i-adratu kirolu, s-aducâ agârsheari.
Nicâpâitu misurâ, pi hirlu a banâljei,
Tu locu di cumbuloi, bairu di anjlji-a melji.






Iu suntu a meali yisi cu dzâni ditu pirmithu,
Shi-atsea mari hârseari ti itsi lucru njicu?
Iu iasti pistipsearea tu oaminji shi tu a-loru zboru?
Mashi lucrî agârshiti di cându earamu fcioru...

16.02.2015





Aumbri fârâ minti

Oh, tu eta-aestâ multu alâvdatâ,
Nu-ari nitsi vreari, nu-ari ni sutsatâ...
Ca s-tsâ afli loclu, nu-adu ascundipseari,
Sh-ancljidi-ts ti daima, inima tu heari.


Tsâni-ts ghini zborlu, vedz cum lu-alâxeshtsâ,
Câ altâ turlui, tuti 'a li pâlteshsâ...
Ma s-alâtuseshtsâ, nu-ari canu s-ti agiutâ.
Va ta s-minduieshsâ cu gura cusutâ!

Canu nu astrâxeashti s-ts-ascultâ caimolu,
Câ pi hala-aestâ i-arâdhâpsitu laolu.
Ampacâ-ti cu tini shi-vedz-tsâ calea ninti,
Elji s-ti veadâ aumbrâ. Aumbrâ fârâ minti...

Ti-'ntreghe câ tse soarli daima sheadi ascumtu,
Ma io shtiu câ tini nu-lu vidzushi di multu...
Uhteadzâ cu splahnâ, ancljidi-ts oclji tini
Shi-minduia câ mâni poa' s-hibâ ma ghini...

10.02.2016





Pîrmithu ditu carti


Eara ‘nâ oară, cânticu shi jocu shi ayapi,
Cu arâdeari, cu doru mari shi-cu miraki...

Tora-atselu cânticu, fârâ stihuri suskirâ.
Shi-află kirearea, canu nu-lu cântâ, lu-agârshirâ...

Di tuti aesti, ici tsiva nu armasi,
Mashi un pîrmithu tsi va lu-adyivâsimu ditu carti...

14.10.2015





Vîmtulu


Canu nu mi shtii di iu ljiâu irushi,
Intru pi geami, iesu pi sumu ushi,
Trecu pitu udadz di feati aleapti,
Hârsescu a loru peru tu mesi di noapti.

Batu muntsâ sh-vâljiuri, pitu ponji sh-pitu lilici,
Lâ portu njiurizma - a pâduriloru prici,
Apa ditu locu u-aducu la nioru,
Shi-frândzâli toamna hârsescu cu doru.

Sh-cându turbatu mi-ascolu tahinârli,
Akimata mutu sh-lj mintescu-amârli.
Hiu frati cu ploaia sh-cu furtuna greauâ,
Di mini s-adarâ nâvâljiuri de neauâ.

Ayalea mi portu pi maluri di-amari,
Sh-vedu vruts tsi s-astringu tu ambârtsâtari,
Mi dânsâsescu s-mi ciuciuru cu luna...
Hiu unâ cu vrearea, VIMTU nj-u numa...

9.10.2015





Zulapea


Cu njiata lui 'tsea zurlâ, cu mintea has câsuti,
Cu ocljii-a lui di gljetsu tsi ljia mirăkili tuti,
Arâdi canda-i loatu...di ti ljia puvria,
S-cutreamburâ Hristolu, s-apârâ Stâ-Mâria!

Tsi manâ iehtrâ lu-featsi, tsi lai crutsi shtsâtâ?
Stihari di fârmacu, cu hiru di măljî tsâsutâ.
Amintă zulapi tsi mâshcâ, alasâ-aranâ,
Mâryitâ pi zurnă cu kicuti di banâ...

Tu somnu lj-avdu boatsea, ca tinicheadz tsi-asună
Câ-nj-anvâli cu lăski shi soarli sh-alba lunâ,
Arcă cinushi lai pi bana-nj zilipsitâ,
Mi-adră di albu anghilu, yilii cingârnitâ...

10.01.2009





Mînduîari


Msheati dukeri s-keru tu cuprii,
Mutrescu di-aynaye shi-nj cadi milii,
Ânj tornu pâltârli shi-nj-u fricâ s-mi vedu
Tu yilii...

Pi câljiuri di banâ ânj caftu scupolu,
Sh-nu potu ta s-nj-ascotu ditu suflitu caimolu...
Câ-i ciulduitu shi-cu mintea kirutâ,
Laolu.

Mi portu pitu' oaminji cu pseftâ cuveti,
Mâduuâ cirucâ, aspartâ mileti,
Un laiu yinatoru' ashteaptâ, s-adarâ - dzâlili
Shcreti.

Lângoari urutâ adusi kirolu
Tsi-astindzi ayapea shi-minteshti iholu,
Âshi toarnâ nutrita shi-n-alasâ tu kisâ,
Hristolu...

7.09.2015






Alatusi armâneascâ

Atselji, niscântsâ livendzâ tsi-avea tufekea,
Umplurâ gâgoshlu cu bâruti xeanâ,
Aminarâ 'ndzeanâ sh-pliyuirâ soarli...

20.09.2015







Geandarlu di nafoară

Cu suflitu golu, cu oculji kiruts, astresu di greu caimo,
Mutrescu stizma veaclji mâcatâ di kiro
Vedu seamni multu-anaxi shi zboară anyrâpsiti
Di tuts turbatslji a loclui cu mintsâli mintiti.
Nâ kicutâ di apâ tsi cadî, ciucuteashti,
Ânj zurliseashti mintea sh-mâduua nj-u tuleashti...

Tu locu di somnu imiru, tu locu di yisu aleptu,
Mi batu cu noaptea lai shi-pumoara di pi keptu,
Tsi-nji tsâni adiljatlu sh-inima-nj frimitâ,
Ânj frândzi tutâ bana, tsi-nj pari dipisitâ...

Tu cornulu di udă, ca-aumbrâ ditu murmintsâ,
Unu omu ancusuratu, cu barbâ sh-fârâ dintșâ,
Mutreashti ca aplö... Lu vedu sh-mi curmâ njilâ
Cu oculji-anyilicioshi, lunjinâ di cândilâ,
Canda sh-ashteaptâ crutsea, cu lumea s-dipiseascâ,
Câ nu-i agiungu anjilji di banâ ta s-hârseascâ...





Alts' doi fciurits s-agioacâ sh-aurlâ shi s-frimitâ,
Niheamâ mi-agârshescu di bana mea jilitâ,
Ma gioclu s-dipiseashti, câ yini iara noaptea.
Shi-nj plândzi iara geanlu shi-nj plângu iara soartea...

Cu ponu greu treatsi noaptea, cu oclji pi duvani,
Nji-amu inima aratsi ca herlu di la geami...
Unâ dupu altâ, sihâtsli lja ta s-kearâ,
Pân' ca turbatu aurlâ, geandarlu di nafoarâ...

Când' ocljii-nj si usucâ, ca toamna-a pomlui frândzâ
Sh-pitu truplu-a meu ânj curâ fârmacu tu locu di sândzâ,
Ânj ieshi tini dininti, a mea durutâ vrutâ,
Sâ-nj dai umuti mari tu-aestâ banâ hutâ...

Hiu câpâitu di tuti, cu mintea trunduitâ,
Mi-arogu ta s-mi lja somnulu, ta s-cadu tu agârshitâ,
S-mi batu cu noaptea lai, s-mi batu cu-atsea pumoarâ,
S-mi-ascolu cându va s-aurlâ geandarlu di nafoarâ...

24.12.2008





Blâstemu


Nâ vreari curatâ ashteaptâ agârshitâ,
Di pustu tsi-i omlu sh-di banâ lâitâ,
Di-atselji tsi-adarâ sufliti s-plângâ,
Di-atselji tsi la vreari nu potu s-agiungâ...

Nâ vreari curatâ shi-ashteaptâ kirearea,
Di oaminji tsi suntu ma amari di hiarea,
Di-atselji tsi au tu hari câvgălu,
Di-atselji tsi bagâ ma 'nsus di vreari, parălu...

Nâ vreari curatâ va s-dipiseascâ,
Ma alanti tuti, t'unâ boatsi va s-greascâ:
"S-lj-agiungâ blâstemlu, s-hibâ fârâ hari,
Tu aestâ banâ, s-nu dukeascâ vreari"...

20.01.2000





Cânticlu armânescu

Cânticlu-armânescu asună,
Sh-bana iasti cama bunâ,
Unâ altâ ahurhitâ, cu sutsata uidisitâ.


Haidits, sotslji-a mei, adzâ s-n-adunămu,
Tuts vâ pâlcârsescu.
Câ n-avemu unu doru, ti zboru shi-ti giocu
Sh-ti cânticlu-armânescu.

Haidits, sotslji-a mei, adzâ s-nâ cântămu,
Unu cânticu di zâmani
S-gioacă fciori ca noi sh-featili cu doru,
Armâni pirusheani.

Haidits, sotslji-a mei, adzâ noi s-nâ vremu,
Câ n-aflămu uidia.
Shi s-n-avemu ca frats, câ va n-armânemu
Cu vrearea sh-cu tinjia!

15.012015






Limba armânească

Limba di eti, scumpâ adeti,
Fâlcari-apreasâ,
Pirâ ni-asteasâ,
Noi nu u-agârshimu.
Fciorii s-u-anveatsâ, cu livindeatsâ,
Pi-unâ cântari,
Di dor shi-di vreari,
Câ armânji nâ himu.

Veachi flurii, sâmtâ tinjii,
Limba-armânească
S-pirmitusească
Ti armânamea mea.
Crutsi-alâsatâ, pitu eti purtatâ
Di stripâpânjii,
Borgi ti-armânjii
Tsi n-anchinăm la ea.






Clirunimii, dultsi uidii,
Grailu aleptu,
Zborlu dishteptu,
Pi 'msheata limbâ a mea.
Nu-ari-aspuneari, ahântâ vreari,
Cântits ti hari,
Stihuri di vreari,
Va nâ cântămu daima.

16.12.2019





Praxi pârîntească


Spuni-nji, lea dado, cum s-mi hârsescu?
Cu cânticlu-armânescu, lele,
Pi iholu arhundescu!

Spuni-nji, lea dado, cum s-minduiescu?
Cu zborlu armânescu, lele,
Dulți grai amirânescu!

Dă-nji, tini dado, praxi pârîntească!
Tsâni-adetea arhundească, lele,
Pi limba armânească!

05.04.2017





Cânticu pi coru

Cânticu âmșeatu,
Pi coru armânescu adratu,
Daima cântatu,
Di armânji cu suflitu curatu.


Cânticu di doru,
S-n-acâtsăm deadun un mari coru,
Pi 'msheatlu-i zboru,
Aspuni haraua-armânjiloru.

Vreari shi-caimo
Âlu cântâ armânji di iuțido,
A meu lao,
S-nu-agârshits armânesculu iho.

Tsi hrisusitu
Cânticlu-armânescu tinjisu,
Nidipisitu,
Ta s-n-aspunâ-a farâ-elji pirmitu.

27.07.2018





Toamnă

Frândzâ-aroși 'mplini di-arauâ,
Bună toamnă 'mșeatâ tsâ-i turnata!


Inu di-arapani mări di-auâ
Ti fciori'i livendzâ tsi cântâ.

Lilici-aroshi tu peru
Ti-featili-armâni tsi gioacă.

S-adarâ numtsâ ti-anami,
Cu mari ducheari ti-armânami!

10.08.2017





Câftări


Cu dor ti iho sh-ti cânticu,
Alagamu pit vâsâlii
Sh-avdzâi unâ boatsi 'msheatâ,
Di-nji câdzu milii.


- Cântu muntili sh-pâdurea,
Omlu 'mșeatu daima âlu cântu,
Shi a-tău cânticu armânescu
Nji-ari hari multu.

- Feată boatsea-ts mâipsitâ,
Muntili di ea asunâ,
Ma nu shtii a meali stihuri,
Câ nu hii armânâ.

- Tsi cara nu hiu armânâ,
Io cu inima duchescu,
Shi va s-cântu cu mari vreari
Cânticlu Armânescu.

Vâ cântămu ducheri aleapti,
Cu vreari ti armânami
Câ vâ vremu, vâ dăm pishkesi,
Cantitsi ti-anami.






Cântămu mâipsiti stihuri
Ti armaneasca mileti,
Sh-nâ hârsim câ nâ ascultâ
Oaminji cu adeti.

12.12.2015





Mashî minduierli...


Tini, vrută, tsi hii unâ cu vimtulu tsi-alagâ pitu lumi shi-
avinâ niorljii grei,
Mashi tini pots s-adari marea plisirnâ shi s-beai ditu
spuma elji.
Minduierli a-meali ti caftâ shi-vrută, nu ti-aflâ....

Tini, vrută, tsi hii unâ cu calea tsi nu s-dipiseashti shi-
agiundzi iutsido,
Mashi tini pots s-adari di iarnâ, vearâ sh-s-algheshtsâ a
meu caimo.
Minduierli a-meali ti caftâ shi-vrută, nu ti-aflâ....

Tini, vrută, tsi hii a mea giunami tsi fudzi alargu, la cafi
soari-anvârligheatu,
Pitu tini pot s-vedu lumea cum iasti shi-omlu cum i-
adratu.
Minduierli a-meali ti caftâ shi-vrută, ti aflâ....

Iho, stihuri: 1999





Fronimâ shi-kiskinâ

Tu minduieri curati, ti caftu dipriună
Sh-tsâ caftu tihea, a tsia, featâ-armânâ.

Cu zboarâ multu-aleapti ditu inima-nji durutâ,
Tsâ caftu mintea, s-vedu ma s-mi vrei, lea vrutâ.

Cu doru shi-fârâ di zboarâ, la a vreariei lunjinâ,
Tsâ caftu mâna, lea fronimâ sh-kiskinâ.

S-ai angâtan nâ banâ di vrearea mea aleaptâ,
Nji-arcaiu mirakea pi tini, scumpâ featâ.

11.06.2019





Hîi vreari shi-caimo

Ti tini feată, alâgaiu tutu loclu,
Mi ardi dorlu, ma multu ca foclu,
Vrearea mi-agiumsi shi-nji tuchashti inima-nji mârâtâ.


Hii a meu iho,
Hii vreari sh-caimo.

Ânji hii blâstemulu, tini pirusheană,
Hii adiatlu tsi mi tsâni tu banâ,
Ânji hii ayapea ditu yisili a meali,
Ânji hii durearea tsi s-amintă ditu vreari.
Vimtulu mi surpâ, ploaia greu mi bati,
Sh-duchearea-nji greauâ iasti a mea câbati,
Nu amu apanghiu, inima nji-u plâmtâ,
Nu pot s-aravdu ahantâ vreari multâ.

Hii a meu iho,
Hii vreari sh-caimo.

27.03.2019





Icoană di keatră

Tini, icoană di keatră, ânj caftsâ-ankinari,
Tini, lutseafiru aratsi, ânj caftsâ vreari,
Mi acâtsarâ a tali mălji,
Tini icoană di keatră,
Suflitlu-nj vrei...

Tini, mâistră pângână, ânj caftsâ hârseari,
Tini, tsi-aspulbiri avrapa yisi di vreari,
Ma va tsâ kerî putearea ta,
Câ yislu-a meu, pângână,
Ici nu-nj si da...

Tini, icoană di keatră, ieshi-nj ditu minti,
Tini, mâistră pângână, vedz calea ninti,
Câ io hîu anghilu tsi va,
Ti daima s-ti vulusească
Tu keatra ta...

2.02.2017





Tricu kiro...


Tricu kiro, feată,
Di anda io, 'mșeată,
Tsâ gream cu vreari, vrută,
Numa a ta...
Sh-aveai tut dorlu
Sh-ayapea mea...

Cum di putushi, feată,
Tini s-mi arâdz, 'msheată,
Frâmseshi cu zborlu, vrută,
Inima mea....
Tsâ anchiseshi calea
Feată câtă ea...

Nâ fu-anyrâpsit, feată,
S-nu him deadun, 'mșeată,
Vrearea s-astindzi
Mashi cu-unu zboru...
S-nu-ts parâ arău, vrută
Di a meu doru...

8.02.2018





Ti unâ steauâ

Mutriiu câta urano,
Ta s-nji-alegu nâ steauâ io.
Tserlu-nji dzâsi "Shedz arhati,
Stealili li-am misurati!.."

Ancâlicaiu nioru di sfungu,
Mashi la steaua mea s-agiungu,
Tserlu sâ-lu imiripsescu,
Ninga ea s-anghilicescu.

S-hiu lutseafirlu di vreari
Tu kindimata di steali,
Câ nji-arcaiu mirakea tutâ
Pi a mea steauâ multu vrutâ.

04.03.2018





Dit negura anjîloru


Tu inima-nj crehtâ, ampiltescu yisi
Shi s-pari câ ushili va-nj hibâ daima dishcljisi.
Nj-ascultu pârintsâlji cum âshi cantâ-ayapea
Când' neaua nafoarâ anvâli sucakea.

Tu casa mea, cu cânticu sh-ayapi,
Cu-armonica-n bratsâ - mâyipseashti tati
Cantitsi veclji, lâ aflâ uidia...
S-li cântâ duruti, Dafina shi-Maria.

Buna Maia Lena cânticlu shi-aspuni
Cu iho durutu, ca ditu altâ lumi,
Cu mânjili-angurtsish, sh-lu leagânâ caplu,
Cu zghicu trimburatu cumu nu s-avdi altu.

Shi s-pari câ bana va-nj hibâ daima lishoarâ
Sh-câ io gaileadz nu va s-amu canâoarâ
Shi va s-amintu lucrî ca mârîlji aslanji...
Cum s-minduiescu? Am mashi dzatsi anji!






Nu amintaiu tutu tsi vidzui tu yisi,
Ni mărlî ushi nu furâ daima dishcljisi.
Ma mi-anvitsarâ tsi iasti dukearea
Shi-câ naima mari aveari ‘i VREAREA...

12.02.2016






Tâtsearî!

TÂTSEARI!...s-ascultu zghiclu di-amari,
S-minduiescu stihuri ti umutea tsi-nj cheari,
Lâsats-mi s-anyrâpsescu puemata-nj plâmtâ,
Shi s-lu-anvetsu birbiljilu, zboarâli sâ-nj cântâ...

Zboarâli tu minti 'nj-yinu apitrusiti,
Ashteaptâ jilioasi s-hibâ arâdhâpsiti
Sh-cându zboru' di zboru' s-adră minduiari....
...Ânj greashti cu yeryu birbiljilu: TÂTSEARI!

- Tsi stihuri-anaxi ampilteshtsâ tini?
Nitsi birbiljiu nu-a li cântâ, shtii ghini!
Câ dzâts zboarâ multi, nu pot s-li tsânu minti,
Shi-nu-agiundzi adiljatlu s-tsânu iholu ninti!
Nu poa' s-nj-aibâ hari un cânticu ahtari!...
...Kirutu shi-ciulduitu âlj grescu: TÂTSEARI!





- Mi-arâsi amurgishlu shi-pâdurea mi-arâsi
Nu vidzui câ-i gaie, cashti di iu dipusi,
Di pi-atsea lumaki mi-anveatsâ s-minduiescu,
Cum s-lu bagu pi-aradhâ cânticlu-armânescu...
Gaia-u feciu birbiljiu, tsi halâ lai-ahtari???...
Mi shutsu câta mini sh-nj-aurlu: TÂTSEARI!!!

01.04.2016





Kireari

Niori di furtunâ s-adunâ nafoarâ
Sh-lo di bumbuneadza, mi-ascolu cu lâhtarâ,
Zundanea nu mi-alasa ta sa-nj vegljiu torlu
Sh-mashi gheritlu agiutâ s-vedu iu bagu ciciorlu...

Dau ta s-iau nâ carti, s-anyrâpsescu stihlu,
Sh-pânâ s-ahurhescu s-arupi muliflu...
Inj si ancljisi tserlu pisti a meali steali
Sh-chisa ânj hârneashti minduierli greali.

Cari s-mi hârseascâ, carí sâ-nj da umuti,
Cându di-anvârliga ‘nj-si surparâ tuti?
Cari lâhtrâseashti din padi s-mi mutâ
Shi s-nj-adyivâseascâ yrama mea durutâ?

19.10.2017





Pots s-aledz!...pots?


Dukishi vâr'oarâ bana pi cipitu di catsutu,
Minuta s-ti-aleagâ, i oarfânu, i avutu?
S-nu shtii cându ti badz, di multi gâilisu,
Cum va ti-ascoli ditu somnu, salami i mintitu?


Tuti s-tsâ hibâ-andreapti, ma s-nu shtii tsi lipseashti,
Shi-a tihi-ei gâgoshu tsi-aiurea agudeashti,
Sâ-lu caftsâ di-anvârliga, agiunu di vârâ praxi,
Ligatu cu lăi singiri tu a minti-ei ahapsi?..

...Cu ochlji mintits mutreshtsâ pi masa blâstimatâ,
La zarili tsi-arcashi cu mâna trimburatâ...
Di jocurli cu bana daima ti-afirishi,
Ma sonea tsi-a tsâ-aducâ? Chirushi? Anâchisishi?

Cand' vrei s-angâldâseshtsâ, tu minduieri chirutu,
Câ tse tsâ bânashi bana pi cipitu di câtsutu,
Ahâtu ts-aduts aminti cându sihatea-amuti,
Di greaua-ts ashtiaptari sh-di xerea di umuti...

4.01.2019





Agârshhearea


Io hiu Vrearea...
Adun oaminji deadunu
Sh-di doauâ sufliti,
Mini adaru mashi unu.

Nj-u numa Sutsatâ.
Cârunâ di steali,
Hiu andrupumintu
Ti ininjili a meali.

Hiu pisti tutu,
Nj-u numa Astuhinu!
Sh-vâ aducu tu taifâ,
Amaru sh-anvirinu.

A njia-nj dzâcu Chirolu.
Vâr' oară nu-aushescu,
Parintili a ets-loru,
Cu banâ mi hârnescu.





Nu pots s-ascaki di mini,
Durearea, Caimolu.
Sh-vâ crescu simitsa
Tsi u adutsi Chirolu.

Hiu sorâ cu tuts,
Chiro, Caimo i Vrearea...
Ma marea sh-ma buna.
Nj-u numa AGÂRSHEAREA!

28.11.2018






Nu mi cânoshtsâ


Nu mi cânoshtsâ sh-nu-ai nitsi-andreptu
S-mi fats ni ahmacu, ni mari dishteptu
S-nj-azburâshtsâ vgarea, sâ-nj giudits vinita
Shi s-ciuciuri di-anvârliga cându-nj vedz mutrita...

Cari ti pistipseshtsâ, di iu shtii ahânti multi,
Cari tsâ da-ndreptu sâ-nj badz damcâ tu frâmți?
Cum di tut ti-aroadi cari nj-u nâfâcălu,
Cum di ti dukeshtsâ unâ cu Dumnidzălu?

Hii omlu tsi veadî tu nâs mashi lunjinâ,
Tsi inima u-ari di mâreatsâ-mplinâ.
Sh-tu laia-ts urgheatsâ nu pots s-vedz ma-nclo,
Ptsâna ghineatsâ tsi nica-i tu lao...

Nj-u fricâ di tini... nu voiu s-ti-andâmâsescu!
Ma nu-ari altâ culai, di tini mi-agudescu...
Câ-i dzuuâ, câ noapti, murgishu, apiritâ,
Tu yisu, tu dishtiptari, mi ardi a ta mutritâ...






Mutrea-tsâ mâreatsa sh-fârmatsili ghini,
S-bânedzu njilji di ori, nu voiu s-hiu ca tini...
Ma, va s-yinâ aradha s-ti vedz cari hii...
Pi mini mi cânoshtsâ! Pi tini ti shtii?...

28.11.2018






Câbatea alî Yannâ


~ di Mihaela Liuta ~

“Nji-am inima ca ploaci, nji-am ochljiulu nisicat,
Aratsi-nji easti geanlu, ca gletsu anfârmâcat!
Chirutâ tu-estâ lumi, arcatâ tu irnjiu,
Înji caftu-arâdâtsinjili, ma nu shtiu cari hiu!
Criscutâ de-anda njicâ dit njila aluntor,
Hiu bunâ mash ti lucru, ma nu ti casa –a lor:
Vream sh-io s-aveam pârintsâ, un zbor bun di la ei,
S-aveam surări, frats, soi, s-uchescu câ s-u-a mei!
Shed singurâ,- agârshitâ, fâr’ s-avdu zbor di om,
Ca mer aspartu sh-muhlid, aruptu di pi pom!”

Sum gortsul di stri cali, di găi apitrusit,
Shidea mârata Yanna, cu geanlu cânjisit.
Njiori s-azvom anvâryi pi tserlu-antunicat,
Pit cohiuri s-veadi luna cu ochilu aspâreat.
Zundanea-azgrumâ loclu, giritlu pliyui
Sh-dit chisa nai ma lai, aumbrâ s-fânârsi.
Mutreashti câtâ Yanna, cu ochi arâi di lup
Sh-tu loclu atsel yiermu, aumbra-acatsâ trup.

“Ashi-i, mârâtâ Yannâ, andreptu-i zborlu-a tău,
Di oaminji agârshitâ, di tuts sh-di Dumnidzâu!
Ghideri nimisurati, multi lâiets tricushi,
Câravi fârâ cali, tu-achimatâ câdzushi.







Tu casâ-apitrusitâ, di daima fâr' paradz,
Fâr' can om lângâ tini, s-te-andoapirâ s-nu cadz.
Nipârticâ di yiergu tu gean ts-anchiushiră,
Chirushi pista pi oaminj sh-pi vrearea-al Dumnidză.

Vidzui cum tsâ mutreshtsâ la casa cu ugeac,
Cu bushlu-astres di yergu, cu inima fârmac.
Ti ardi ca nâ pirâ haraua lor dit gean.
Mutreshtsâ di la poartâ, ma nu te-aproachi can.
Nâ featâ au, -Nghela, tsi-i hâidimena lor,
Criscutâ mash pi pălnji, lunjina ochilor!”

Sh-adutsi-aminti Yanna, de-anda u cunuscu’
Nghela u-apridunâ, ti ea zbor bun avu.
Msheatâ ca un anghil, ca numa tsi-u purta,
Ea codurlu di pâni cu Yanna lu-ampârtsa.
Cu shasi anji ma njicâ, bubuchea s-dischidea,
Criscu lilici-mshetâ, tu hoarâ s-alidzea.
Aumbra s-njiureadzâ, s-aproachi ninga ea,
Lji-adghivâseashti geanlu sh-lji-ashutsâ inima:

“Nihitâ sh-lai Yannâ, nu pots i nu vrei s-vedz?
Câbatea-i ali Nghelâ, te-atsea nu pots s-te-andredz!
Di njicâ estâ featâ ca schin într-ocli fu,
Ghineatâ sh-vreari multâ, harauâ cunuscu.
Câ ts-arâchi, mârâtâ, ts-asmulsi tutâ tihea,
Tu geanlu-a tău cunoshtsâ, stii ghini câ-i dealihea! ”





Shidea mârata Yannâ, cu mintea-ntunicatâ
De-anchizmuseumeari greu sh-di yiergu azgrumatâ.
Cu bushili astreasi, mutrindalui chirut,
Nu veadî-arâslu-aratsi a harlui nividzut.

“Tsi vrei, mârata Yannă, aspuni-andreptu sh-tari!”


Gri Yanna: “Andriptati ti-a mea greuâ cripari!”


“Vrei andriptati, feată? Io va te-agiut, sâ shtii
Sh-nu voi ta s-mi pâlteshsâ cu-asimi i flurii.
Ascoati-ts ahtea, Yannă, avinâ yislu-arău,
Te-aestâ s-dai curbani tu soni geanlu-a tău!”

“Vrei geanlu-a meu? Tsi-i geanlu? Nu-angreacă ici tsiva!
Cum nu-angrică ni tihea tsi-avui, ni bana mea.
Mutrea zigha di noapti! Ea nuntru, io nafoară,
Cuvetea tsi u-am tora nu-avui io canaoară.”

...De-alargu tut mutreashti nâ moashi anviscutâ,
Sh-ashteardzi cu shamiyia nâ lacrimâ tâcutâ.
Nu s-pari multu moashi, ma geanlu i-aushit
Di-unâ dureari mari, di dor nicâpât.

“Cum treatsi tinireatsa, ca vimtul pisti loc,
Di greu astipseari n-adunâ bana stog.
Adrai câbati mari tu eta di ma ninti
Sh-cânjina tsi mi ardi me-adarâ s-cher di minti.






Nji-avui fiticâ njicâ, tsi s-featsi dit mârtiyii.
U-arcai tu xeanâ-avlii, di manâ s-nu mi shtii.
Ti-arshinea-atsea di lumi me-arcai tu greu caimo,
Adrai un suflit s-chargea sh-di oaminji sh-di Hristo.
Cu trupu sh-nai ma multu cu inima-astipsii.
Câbatea mea hii, Yannă, a mea câbati hii!”

Cu inima cârbuni, di anji anduplicatâ,
Mutreashti câta Yanna tsi-i singurâ la poartâ.
U veadî cum s-aurlâ didindi tu ubor
Shi, pe-ascumta, tu casa iu shed vitsinjii-a lor.
Zundanea u anveashti, cu tor lishor di mirâ,
S-azvoami-n casâ Yanna, cu suflitlu di pirâ.

Nafoarâ, aspăreatâ, cu inima di cheatrâ,
Canda ducheashti ninti martiyia tsi-ari s-facâ,
Mârata moashi avdi un zghic amar di jali
Sh-vidzu cum Yanna-ansari nă geami di stri cali.

Alagâ Yanna, cadi, cu trupu trunduit,
Tut s-mutâ sh-fudzi iara, cu tor nicăpât.
Niorlu atsel lailu tsi mintea i-anviscu
S-aspulbirâ. Sh-atumtsea, mârtiyia sh-u vidzu.






“Lăi, demun fârâ numâ, cum me-arâseshi pi mini
Di vâtâmai un anghil cu arichi di asimi?
Nji-arcashi tu gean inati sh-tut yiergul dit lao,
Di înji chirui umutea shi vrearea ti Hristo.
Ti-atseali tsi am faptâ înji dau bana curbani,
S-ts-armânâ geanlu yiermu, aratsi sh-lai câtrani!”

Cu oculii-astreshi s-arucâ tu-arâulu fuviros
Tu bratsâli a harlui tsi u-ashtipta nghios.

U-aflara tu-apa Yanna, tu oara dit hâryii,
Sh-u-adusirâ vitsinjii tu oarfâna avlii.
U blastimâ sh-u plângu, cu njilâ sh-cu dureari
Ti oarfâna tsi s-dusi, mâcatâ di lîngoari.
Dit truplu fârâ banâ s-asvoami apâ-aratsi
Sh-un adiat ascumtu pi budza canda-lj treatsi.
Îs pari câ mutreashti cu ochi antunicat
Singirlu ali-Nghelâ tu buslu-ancârçiyat.

2018







*Pîrmîthî dî pîstî locu
(Câbatea alî Yannâ)*

Tu thadi chiro, tu etâ-agârshitâ,
Trecu cu mari vreari banâ tinjisitâ,
Lâ-i suflitlu lishoru, ca a puilui peana,
Câ-shi djurarâ vreari. Elu Ianaki, ea Yanna.
Sh-lâ-i dzua sirinâ, mashi pi-unâ cântari,
Geanlu lâ-i curatu, fârâ di cripari,
Nu shtiu di ni-aveari, pi suflitu nu-au aranâ,
Tuti lâ sunt' pi hari, nu-s ciucutits di banâ...

...Ma vini arada, aesti s-hearâ tuti,
S-featsi polimu greu sh-lâ-asteasi a lor umuti,
Di ninga 'msheata Yanna pi Ianaki îl loarâ,
Tu laia ashkeri, alargu di hoarâ.

...Nai' marli livendu nu fudzi di-acasâ,
Câ lipsea shi-n hoarâ unu bârbatu s-alasâ...
Di mieri sh-cilimeanjili elu s-aibâ angâtanu,
Di tuts naima avutlu, Yanni ca aslanu!






Pi Ianaki mutreashti Yanna-anfârmâcata,
Alargu-lu pitreatsi shi nu-i shtii turnata,
I-andreapsi bineclu, cândila u-apreasi
Shi tu praglu di ushi, în bratsâ lu-astreasi...


...Ma, pisti a lui numiru mutrea pi sum peani,
La casa di stri-cali, tu firida-alu Yanni...

Shi-lu mutrea di-aynanghea, cu prosupu di sâmâtă,
Pi Ianaki cum fudzi cu inima frâmtă...
...Durearea-i fu shcurtă câ mintea-i lucra.
A ei minduită la Yanni iara...

Tricu chiro di-atumtsea, Ianaki protlu iasti,
Livendulu ashkirlă dushmanlu agudeashti,
S-dipisească tuti, s-armână tu bană
Ta s-u astringă-n bratsâ iara a lui Yannă...

...Ma vini shi-dzua lai când' tihea s-dipisi,
Pustulu di gâgoshu te-a moarti lu-agudi,
Cadi cu-anvirinu, ma nu poa' sâ-shi da bana,
Mashi nica nă oară, s-u veadă pi Yanna...






Gri la Dumnidză s-lu-alasâ nica n'heamâ
Shi-cu mari caimo mută mânjili-n dzeanâ,
Crutsea crishtineascâ pi cheptu s-u-adarâ
Mashi s-aibâ umuti câ va s-toarnâ-n hoarâ...


...Dumnidză di-analtu ponlu i-ascultă,
Shi-adună niorlu di bumbunidză,
Arcă ghiritu di-asimi tu rana-i sândzânatâ,
Sh-inima dit cheptu lo iara sâ-i batâ.

...Di atumtsea, pi Ianaki, itsi lu-agudea,
Câ gâgoshu i palâ, tsiva nu ducheia,
Câ avea tu trupu alu Dumnidză puteari
Sh-armânea tu banâ ti a lui mari vreari...

Avdzânda hâbârli, Yanna tnjisita,
S-cutrimbură pi locu, "Cum va-i tsânu mutrita?
Tsi-ai dzâcu tu turnatâ, lele, mintea-nj cheari,
Câ-angrupaiu sum locu a lui mari vreari!..."

Mindui nihita tsi s-facâ sh-cum s-adarâ
Sh-avrapa âshi lo calea la mâistrâ-n hoarâ,
La moashea 'ncusuratâ, tu lai-anviscutâ,
Tsi fatsi sh-disfatsi măi ti lumea tutâ.







U tâxi mâistra bashi tu atsea searâ,
S-aspunâ unu blâstemu, pi Ianaki sâ-lu chearâ...
Ma laia mâistrâ nu putu s-adarâ
Ahtari câbati shi-sh lo calea-'ntroarâ,
S-lu-aflâ pi Ianaki, averlu s-i-aspunâ,
Câ numata lu-ashteaptâ Yanna lui 'tsea bunâ...
Cum avdzâ habarea, inima-i si frâmsi,
Câdzu pi dzânuchi, sh-di dureari plâmsi,
Câ tsiva nu-armasi, mashi anvirinari,
Bana nu-i tsiva ma s-nu aibâ vreari.

- Dâmândâ-lji ali Yannâ blâstemlu di la mini!
“Câtâ vreari-armasi, ahâtsa anji ti tini,
Tu loclu iu-aschumseshi vrearea mea curatâ,
Di azâ tu trei dzâli, aclo s-hii angrupatâ!”
- Dzâlji aesti zboarâ, câ-nj eara vrutâ-'nveastâ,
Sh-prindi ti dureari, tagmâ sâ-nj pâlteascâ!”

Sh-lo s-arâmâ loclu, câ mari i-u durearea,
Di yiu ta s-angroapâ, ta shi-aflâ chirearea,
Suflitlu-i curatu îi si anfârmacă,
A vreariei Demunu, Ianaki ma s-adră...





...La casa ei dit hoară, ninga laia poartă,
U-agiumsi blâstemlu sh-cadi Yanna, moartă,
Singurâ sh-câftă a ei lai soarti,
Ti câbatea-i greauâ tradzi sh-dupu moarti...

12.12.2018







Pîrmîthî dî sum locu

Hâbări fuviroasi inu ciuciurati...
...Azburashti lumea di laia sihati,
Cum Yanna mârata, aseara muri,
Sh-unu câni turbatu pisti moartâ-ansâri...

Oaminjii dit hoarâ loarâ câtâ-aclo,
La casa di iu s-avdi jilos miryiulô,
Cumâts di fimnjiamâ tu mânâ astringu,
Sh-di poartâ 'i-ligatâ nâ canâ di cingu.
Zulăchi ditu altâ lumi ishiti ditu pāduri,
Cu demunji tu poartâ shedu cârăuli,
Tu anustulu udă, nâ-aumbrâ turbatâ,
Anveashti ti puvrii sfinducea cripatâ,
Nâ lândzitâ pirâ di la cāndila frāmtâ,
Cu greu lunjineadzâ nâ icoanâ sām̃tâ,
S-cutreamburâ loclu di a tserlui stihii
Sh-varcolats arada, shedu pāryurii...

...S-aspuni câ Yanna, ti câbatea-i mari,
Fâr' di-agârsheri, fâr' di ljirtari,
Demunlu tu mânâ suflitlu îi lo
Sh-tu chisâ ti daima îl vulusi aclo.







Cu boatsi vrâhnâsitâ aurlă blâstemlu,
Cum Yanna s-nu aibâ crutsi di lemnu,
Ni tu mermintsâ s-nu sh-aflâ arhatea,
Nitsi câmbanâ s-nu-lji ljiartâ câbatea!..

Crishtinjii dit hoarâ, s-aproachi di casâ
Ciulduits di fricâ, di mânji nu s-alasâ
Sh-ca s-u ascapâ Yanna di laili fârmatsi,
"Dumnidză s-u ljiartâ!", girî tu-unâ boatsi.
Nu-acâtsarâ ghini zborlu s-dipiseascâ,
Nitsi altsiva nu puturâ s-greascâ,
L-anghitsă pi budzâ itsi mindiuari.
Câ numata-au vidzutâ nâ uryii-ahtari...
S-cutremburâ casa, stiznjili s-creapâ,
Ascapirâ tserlu shi loclu si-'neacâ
Di sândzâ urutu, cashti di-iu ishitu,
Sh-di'ndzeanâ agudeashti fuvirosu ghiritu.

Demunlu aurlă pi limba-i pângânâ
Sh-nâ palâ di pirâ astrindzi tu mânâ,
Ca sâ-shi ia curbanea, Yanna atsea crishtinâ,
Boatsea îi vuiashti, gloata s-avinâ...


"Tu surpu sh-tu chisâ, ascâpats-vâ bana!",
Sh-loarâ ta s-alagâ, "Alâsats-u Yanna!.."






...Mashi moashea 'ncusuratâ tu lai-anviscutâ,
Cu mutrita-n padi, prosuplu nu-l mutâ,
Minteashti tu budzâ zboru ni-angâldâsitu,
Discânticu anaxu, clirunumisitu
Di la stripâpânji ditu etâ-ascâpitatâ,
S-disfacâ blâstemlu ti Yanna mârâtâ...
Tu zundanea lai, mânjli-n dzeanâ mutâ,
Sh-semnul di crutsi lu-adarâ chirutâ,
Treamburâ sh-s-anchinâ, tatsi sh-iara greashti,
Cadi, iara s-mutâ sh-iara s-arcuteashti...
...Pânâ tu-apiritâ, greu s-ampulisi
Demunlu s-pitreacâ sum locu, di iu ishi...

...Tu datâ, pisti hoarâ s-ashtirnu tâtseari...
Nu s-avdi ni zboru nitsi aurlari,
Loclu nica afumâ di dimuneasca pirâ,
Mashi câti vârâ 'miari s-avdi cum suschirâ...
Oaminjii dit hoarâ iara s-adunarâ,
Misali crishtineascâ a Yannâ'ei s-i-adarâ,
Sh-cându s-apruchearâ di casa blâstimatâ,
Câmbana di bâcâri lo iara ta s-batâ,
Câ moashea 'tsea crishtinâ lo pi ea câbatea,
Suflitlu a li Yannâ ta sh-aflâ arhatea...






...Di funea di câmbanâ shidea aspindzuratâ
Moashea 'ncusuratâ, di vimtu ligânatâ
Sh-pi cheptu nâ yramâ avea alichitâ,
Cum nitsiunâ câbati nu-armâni nipâltitâ...

Din dzeanâ, ditu tseruri, s-avdzâ nâ boatsi mari,
"Bunlu sh-arăulu au idyia puteari!"

Mai 2018






SHICĂI

UNÂ-I BANA, ALTÂ NU-ARI

Unu âmsheatu gioni armânu
Di tuts sotslji naima bunu,
Nâ sihati cu elu s-sheadâ
Featili âshi bagâ-aradhâ...
Li minteashti sh-li acatsâ
Cu arâslu di pi fatsâ,
Nâ lilici lâ adutsi,
Sh-gionli-armânu ashi lâ dzâtsi:

-Io-nj hiu gioni ca aslanu,
Mi-asprigiuru pi tihea tsi-amu,
Câ la feata tsi mi va,
Nu potu sâ-lj dau bana mea.
Sh-nu voiu sâ-nj mi dânâsescu,
Cafi dzuuâ s-arisescu
Feati 'msheati tsi nj-au hari,
Unâ-i bana, altâ nu-ari...






Feati buni, tihea mea
Nu u dau a curiva!
Njii di anji cu mini s-shedz
Nu ts-agiungu ta s-bânedz.
Sh-vâ dau feate, ti ciudii,
Nâ bâsheari pi-ayunii...
Nu v-arcats mirăkili buni,
Câ va mi câftats pitu lumi...

10.02.2015





ARMÂNLU LA MUNTI


Tâshi tu muntsâ anâltsâ vinim tuts armânjii,
Cu câciula strâmbâ, has ca stripâpânjii,
Alinăm pi ohturi di neauâ anvâliti,
Sh-andisâm cu splahnâ, carni, inu sh-piti.


Tuts, cu njicu, cu mari, anchishurăm din-dzeanâ
Andrupâts cu ieryu, di unâ cârlibanâ,
Him multu livendzâ, arâvdâmu arcoari,
Sh-nu ari canu ca noi cându-i ti-azburari...

Nâ tradzi dârtsina, câ de, him armânji
Picurari di trâmbâ, ca a-noshtsâ pâpânji
Ma, nâpoi s-mutreshtsâ, lele tihi lai,
Nu ari nitsi njielu, ni cicioru di oai...

S-alâxi chirolu, lele-armânji giunari,
Nu him ca pâpânjii, nu him picurari,
Va s-angâlâldâsimu, halâ lai-ahtari,
Câciula pâpânjiloru nâ ini ca...mari...

5.01.2017 – Sinaia







MA DIALIHEA, MA DIXARGU...

Tu usha di hani, cu perlu-a lui suru,
Sheadi hângilu, ca vâr' pâyuru.
Âshi frândzi mâdua, shi-s fatsi pishmanu,
Câ tse tu a lui hani nu intrâ canu ...
Canu nu-shi shutsâ ocljii câtâ a lui hani,
Câ, di prota dzuâ, elu deadi anami...
Trecu shi-sh dzâcu tu budzâ "S-lu ardâ ghiritlu!"
Câ tuts, njicú-shi mari, lj-avdzârâ pirmithlu...

...Tu-unâ msheatâ searâ, sirinâ sh-avroasâ,
S-mutâ multsâ-armânji, cu hâshi di-acasâ,
Ta sâ-sh bea unu yinu shi-s mâcâ nâ pitâ,
C-avdzârâ di hanea naima hrisusitâ...
Intrâ cu miraki, cântâ pi iho,
Azburâscu multu, mari halazmo...
Mutrescu mâiryioanjia cum aluatu frimitâ,
Shi-lâ yini la nari, njiurizmâ di pitâ...





Dupu vâr' sihati...

- Haidi tora, vdzits!

Nu-agârshits tu vgatâ, pita sâ-nj pâltits!

Duri anjiurdzearea di la pita mea,

Câti optu liri va ta s-dats ti ea!

- Tsi pitâ, nihite? Nu dideshi tsiva!

- Dedu, vâ sâturau mashî cu njiûrizma!

Bre, s-lu-aspealâ amarea, iasti hasu aestu?

N-află tuts ahmats, elu marli dishteptu?

Shi-s mutâ unu gioni, dzâsi "Va lu-andregu!

Mashi unâ minutâ, punga sâ-nj dizlegu!"

Disfatsi peanarga a pungâljei hiri

Sh-arucâ pi masâ, doauâ pinduliri...

- Tsâni, bre hângi, borgea di la noi!

Sh-avrapa âshi bagâ paradzljî nâpoi.

- Njiurizma di pitâ, multu n-arisi

Sh-tini-avdzâshi parălu, cumu sâ-cingârni.


Ghini s-tsâ si facâ, s-ti acatsâ turbarea!


Noi cu anjiurdzearea, sh-tini cu avdzarea!

Sh-di atumtsea hângilu, ditu musheata hoarâ,

Adastâ tu ushi, la hanea lui goalâ...

17.08.2016






BACK TO INNOCENCE


Unu armânu ditu câsâbă
T-unâ vearâ s-asculă
Sâ sh-aducâ feata-n hoarâ,
Câ-i stresatâ...di la shcoală...

Agiumsi aclo aslanlu
Nu pirpadi, cu Mertsanlu...
Dânâsi tu mes' di hoarâ
Sh-cilimeanjilji s-adunarâ
S-u-ashteaptâ atsea fiticâ.
Nu vâ dzâshu, âi nica njicâ...

Dipusi ditu aftukinâ,
Cu videlji, câ de, 'i lunjinâ
Shi 'i-dzâtsi-a tat-sui fâr' arshini:

- *Hey dad*, aoa nu-i ti mini!
IP phonecall nu pots s-dai
Câ nu-ari semnalul *Wi-Fi*,
Câ-i voahâ di la cutaru
Câ nu-i ca la Budha Bar...







Ama tat'-su vdzi trâ-oară
Sh-u-alăsă tu mes' di hoară.
Nu tricu ni pi la hani,
Tsi s-adară, *time is money*...

Sh-ahurhi ea tutu s-da mari
Câ ari-*iPhone*, nu shtiu di cari
Sh-ari *Facebook* cu *Whatsapp*
Di nu lâ mata dai di capu...
Sh-un calulatoru aslanu
Cu multsâ *gigabytes* di *RAM*
Tsi *boot-eadzâ* elu trâ-oară
Pi makinâ *virtualâ*...

...Nâ fiticâ tsi-asculta
S-u mats – ashi 'msheatâ iara,
Cu njicâ boatsi lj-aspuni:
- Avdzâ, stii, io am unu câni!
Yina, s-n-agiucămu deadunu,
Nu ti mâshcâ, 'i câni bunu...






Câtsâlaclu, njicu, nu mari,
Lj-ansâri-n bratsâ cu vreari
Sh-multu s-minâ shi iara s-pindzi
Sh-pi mânji featili li-alindzi...
...Tutâ veara s-agiucarâ
Cu câtsălu di la hoarâ
Sh-feata noastâ, tsi ciudii,
Nu ma vru tehnologhii!
Câ duki ea, câ la hoarâ,
Nu-ari banâ *virtualâ*!

20.02.2016






INIMÂ DI GLJETSU

Cu mutrita has câtsuti,
Lja mirăki la multi vruti.
Sh-tu keptu' tsâni-aspâstritâ
Tu gljetsu-inima-nvâlitâ...

Iasti-armânu shi-s tsâni-andreptu,
Sh-nu-shi da inima ditu keptu.
Mashi cu vreari armâneascâ,
Inima lui va s-tukeascâ.

Gionli-armânu, gionli cu hari,
Ishi seara priimnari...
Sh-pânâ sâ-shi yinâ pi minti
Âlj ishi vrearea dininti...
Shi vidzu , 'nâ featâ-armânâ
Trupu musheatu, cu ochi di dzânâ.
Lu mutri duruta vrutâ
Shi-lj tuki inima tutâ.






Sh-di-atumtsea, cu 'msheata-armânâ,
Vruta lui cu ochi di dzânâ,
Trecu nâ banâ arhundeascâ
Cu dukeari armâneascâ.

Ditu lao', ditu lumea tutâ,
Sh-află naima 'msheatâ vrutâ!
Cându vruta lu mutreashti,
Cu doru inima lj-u-anveashti.

11.02.2015







MADE IN JAPAN

Nunlu shi-nuna, tsi ciudii
Vdzirâ-alargu cu irushi.
Tu locu' di pitâ-armâneascâ
S-bea *sake* shi s-mâcâ *sushi*.
Sh-nuna nâ armasi agiunâ
Câ tutu pita-i naima buna...
Nunlu mari âlu lo dorlu
S-yinâ s-cântâ cu "*Iholu*"...

Xenjlji stiu, lâi, nune frate,
Câ armânlu vindi cashu.
Tuts ti-ascultâ sh-nu dukescu,
Câ tini lâ vindzâ prashi!
Armânlu ca s-hibâ-ambaru:
Apâ s-aibâ la cutaru
Armâna s-frimitâ pitâ
S-curâ shopatu, shulinaru...






Dzâtsi lumea, nuna taha
Lo s-priveadâ tâshi *Osaka*
Ma, noi shtim câ-i naima ghini
Tutu, tu hoarâ, Alifaka!
Tsâni, nună, caplu n'dzeanâ,
Hii armânâ pirusheanâ
Nicukiru ai Steryiu San
Gioni-armânu, *made in Japan*.

Tini nune, nu ti-aspari,
Makibishi shi-kamayari
Noi „*Iholu*“, fârâ hazi,
Ti tini him *kamikaze*...
S-lâ cadâ' a xenjiloru milii
Tsâ cântăm ditu Românii
Sh-dzâtsem nune, pi iho:
Sayonara-arigato!

29.06.2015





TRANDAFILA


Tsi s-adaru mini mârâtlu,
Mi lo dor di vruta mea.
Va s-iau unâ trandafilâ,
Sh-noaptea 'est - a negu la ea.

Trandafila âi lilicea
Tsi nâ ambită noi doi,
Njiurizma ei mâipsitâ
Nji-adusi vruta nâpoi.

Shideam sh-u-ashtiptamu pi vruta,
Bana tutâ s-him deadun,
Sh-mi anvitsă nâ trandafilâ
Ali vruti-ashi s-i'aspunu:

“Tini vruta mea âmsheatâ,
Angatanu candu va s-inji,
Câ vrearea-i ca trandafila,
Easti 'msheata sh-ari skinji...”

10.01.15





OH, LELE


Sheadi-armânlu shi s-frimitâ,
Câ adră guva tu pitâ...
Caplu fatsi, caplu tradzi.


Câ ari multâ cuveti,
Nu shtii di murafeti.
Caplu fatsi, caplu tradzi.

Armâna-i fârâ cripari,
Tutâ dzua pi cântari.
Tuts ia calea sh-nâsa valea.

Câ ea li tricu pit minti
Sh-tuti lucârli s-duc ninti.
Ea ancupârâ, ea vindi.

Oaspi nou ma s-chindruieshtsâ
Atselu vechilju s-nu-lu agârsheshtsâ
Tuts ia calea shi-nâsa valea.






Vrearea ari-ahâts caimadz,
Cât suntu tu lumi-ahmats.
Caplu fatsi, caplu tradzi.

Cându oala îi vigljiatâ,
Nu poati pi focu ta-s vearsâ.
Câ tinjia la muiari,
‘i-mushuteatsa naima mari.

Proverbi armâneshtsâ uidisiti pi cânticu





UNÂ NJII DI BUIEI


Bubulitsli ditu pâduri,
Ghini lucârli s-lâ neagâ,
Vor shi-aleagâ amirâlu,
Isapea ta s-lâ si-andreagâ...
U bâgarâ-amirâroanji,
Na, fuiauâ cara s-vrei,
Pi-ambupsita gushturitzâ
Cu-unâ njii di buiei...

-Cum s-bâgăm, bre, gushturitzâ,
Nâ lipseashti nâ furnjii...
-Mmm, tsi cara i-ambupsitâ,
Ari ma multâ sculii...

...Multâ vazi tu pâduri,
Bubulitsli si adună,
S-veadâ noaua-amirâroanji,
Huzmetea poa' s-hibâ bunâ...

...Agiumtâ naima livendâ,
Cu-ahânta puteari multâ,
Shi-alâxi altâ buiauâ
Shi s-fâtsea câ va s-li-ascultâ...







Azâ unâ, mâni altâ,
Maubetea s-nu u tindâ,
Cum ineau shi-aspunâ ponlu,
Tutu îi si-alikeau di limbâ...
Cându peambinâ i gialâ,
Cucavâ i mushanghinâ,
Gushturitza ambupsitâ
Ninti lucurlu lu-avinâ.
Shi-di cându amirâroanji
Gushturitza s-amintă,
Ashi, dzuuâ dupu dzuuâ,
Aproapea li-angiumitică...

(Ma hii mashi nâ bubulicâ,
Amiră s-tsâ-badz di vrei,
Nu aleadzi gushturitsa
Cu-unâ njii di buiei....)

...Nâ nâpârticâ subtsâri,
Di sum locu ishi nafoarâ,
Shi-pân' s-ducheascâ gushturitsa,
U mâcă tu-'nheamâ di-oarâ...

(C-ashi lucârli su-andreapti,
Cu irtari câ vâ 'spunu,
S-nu ti vedz naima livendulu...
Itsi nunu îshi ari nunu!)






Eh... ashi câ, veaglji-ts torlu...
Nâ prâxi tsâ dau, di vrei,
Nu-ambupsea vâr'oarâ zborlu
T-unâ njii di buiei.
Va tsâ neagâ unâ oarâ,
Mashi ahâtu! Fârâ shicai...
Cand' dzâts albâ, las-u albâ,
Cându-i lai, las-u lai!

8.01.2019






PAP' DODLU

Pi munti, cu oili, pi calu ancâlaru,
U bati gâidurca, pap' Dodlu - picuraru,
Îshi pashti cupia, sh-cântâ tinjisitu
Cu mari miraki, unu cânticu tsângâsиту...
Shicâgi di daima, ashteaptâ vârâ glaru
Ta sâ-i treacâ praglu, 'ndzeanâ la cutaru,
Ashi, sâ-i caftâ mintea, sâ-i greascâ la masâ
Ta sâ-i chindruiascâ vâr' minciunâ groasâ...

...Unu mari anvitsatu tsi-anchisi ditu vali,
Agiumsi la stani câpâitu di cali,
Sh-trapsi la câliva ditu cipitlu di munti,
Ta s-lu-aflâ Pap' Dodlu, atselu cu hârli tuti.
Cum dishchljisi usha, vidzu unu ausheacu
Cu ochi anghilicioshi, mutritâ di dracu,
Tsi-arcă nâ cumatâ di carni la câni
Sh-tu cingu 'shi-turna lapti pisti pâni...






- O, bre olangim, avdzâiu câ pri-aoatsi,
Iasti unu laiu papu, tsi multu li coatsi,
Taha minciuneadzâ tu 'nheamâ di oarâ,
Sh-mashi cu 'ndoauâ zboarâ, ti adarâ cioarâ...
...Voiu ta sâ-lu cânoscu, s-vedu tsi ari-n capu,
Nu va-s poa' s-mi-arâdâ, hiu omu anvitsatu...

- Ooh, tini crishtine, ti-n'heamâ-amânashi.
Tu banâ, pap' Dodlu, azâ nu lu-aflashi...
Ti-alinashi pi munti, bătushi ahântâ cali,
Shi-tu locu s-hiu hârsitu, mi aflashi di jeali...
Cum s-dusi, Dum'-iartulu, di bun shi-sânâtosu?..
Sh-cu mari dureari, 'lăsă mutrita-'nghiosu...
- Pi-amurgishu, aseara, si turnă la stani,
Cu a lui gâidurcâ, cu cânticu ti-anami,
Cum shidzu s-tsineadzâ, lele lai soarti,
Îi si-acâtsă mâratlu... mâca pâni cu lapti!..

...Sh-cu lâcrânji 'ntrocljii lo ta s-anyrâpseascâ
Nâ yramâ durutâ, ta s-li câliseascâ
Featili-alu Pap' Dodu', s-inâ ta s-aducâ
Stranji ti-angrupari sh-tsiva gârnu cu nucâ...







- Ti pâlâcârsescu, dipuni în hoarâ,
Adu-lâ-aestâ yramâ, ta s-mutâ trâoarâ!
Tora, ayunjisea-ti, câ-i multu-amânatu,
Lasâ-mi s-jilescu câ-nj hiu multu cripatu...

...S-ayunjiseashti omlu, avrapa anchiseashti,
Ciulduitu di minti, nâslu s-mindiuashti,
"Cum va lâ dau mâratlu, aestâ yramâ lai,
Tsi tihi urutâ putu ta s-mi astai?
Cum putu ta s-facâ lucru iehtru-ahtari,
Bashi mini, mâratlu, s-lâ dau laia hâbari?.."

...Tahinima 'msheatâ pi ohturi s-ashtearni,
Soarli-ascântiiazdâ shi-Pap' Dodlu nica doarmi,
Shi-tu isu, a lui shicai niheamâ îi furâ
Un sumuarâsu anapudu tu cornulu di gurâ...
Nu-acâtsâ ta s-tindâ, nitsi s-alâxeascâ,
Câ avdi di-aynaghea nâ boatsi muireascâ:
"Io tsâ dzâcu, lea soră, fendi nu-i salami,
Tora acatsu câuli câ va-lu aflâmu ti-anami!"

...Nitsi ciucuteari, shirta cârtsâneashti,
Shi-usha di câlivâ di stizmâ s-agudeashti,
Intrâ ca tufani: "Tsi-ai fende, turbashi,
S-bâtemu ahântâ cali, digeaba nâ bâgashi??"






- Ehee, featili a meali, nu io, voi turbatu!
Cum, cu tutâ mintea, muntili-alinatu?
Nu vâ ticni la canâ câ-i minciunâ groasă,
Nu shtits câ di la lapti, ici nu tsâ si-acatsâ?
Urbarea-avea nihitlu, atselu ahmacu cu carti,
Câ mâcamu dinintea-i, bashi pâni cu lapti?..

Praxea:

Ta-s cânoshtsâ omlu, nu-agiundzi unâ hari,
Xiki a ta mâreatsâ, xiki a ta-anvitsari...
Ma pi partea-alantâ... mini nu mi njirâ...
Cându muri Pap' Dodlu, canu nu-lu pistipsirâ...

6.10.2019






AHÂNDŌASĂ MINDUIARI...


Un sotsu bunu, tu aftukinâ,
Ashtipta veardea lunjinâ.
Sh-cum shidea pi minduitâ,
Azgrumă nâ pufcâtâ...
Câ tutu îl mâshca bâriclu,
Dzâsi ca-i draclu-atsel njiclu,
De, mâratlu tivikelu,
Nu-avea canu pi ninga elu.

Cum tritseam pri-aclo, pirpadi,
El s-fâtsea câ nu mi veadî.
Îi facu semnu, ici nu-s minâ...
Sh-hop, ansar tu aftuchinâ!

Cum s-u ascaldâ, cum s-u andreagâ,
Tsi s-dzâcâ s-mi lishureadzâ?
A vâr' șoaricu câ psusi, câ paputsa s-alichi
Di vârâ guluvanu din padi...

...Ma ashi lucrul vizdzu,
Greashti, nu-ari câtâ iu:
-O, bre soatse, nu ti-aspari,
Curlu nu-ari minduiari...
Ma io pot lăi soatse, djuru,
S-minduiescu pi la curu.






Shtits...a njia nu-nj lo hari,
Câ-nj câdzu perlu dit nari...
(Sh-di pi mânji sh-di pi cicloari)
Di ahtari minduiari...

-Ashi bana va s'u-avinji,
S-ai în cap multi bishinji.
S-veadâ lumea câ shtii multi,
Câ a ta ma multu-amputi,
Va s-fats mari astrindzeari
Ti-ahândoasâ minduiari!

Mari voahâ, 'nj dzâcu tu minti...
Sh-elu s-ascârkina târ-ninti,
Di curu câ eara-alikitâ,
Pândzâtura muzgusitâ...

-Ashi soatse, cum dzâts tini,
Tora ascultâ-mi sh-pi mini!..





...Shi-i tornu nâ minduiari
Cum nu s-ari faptâ-ahtari!
Mari, groasâ, cu iho,
Câ mi aspâre sh-pi io.
Di s-cutrimbură amaxea...
Sâ-i dau a nihitlui praxea,
S-minduiascâ ahândosu,
Di la cap, nu di dighiosu!

-Oară bunâ, hâriosu!
-Ptiu, s-ti ia draclu, ti-aynosu!

22.10.2015



Tiparul executat în
TIPOGRAFIA
UNIVERSITĂȚII MARITIME din CONSTANȚA